



سيارن اخبار
PRESS RELEASE

KEMENTERIAN KESIHATAN • Jalan Menteri Besar, Bandar Seri Begawan BB3910, Negara Brunei Darussalam.
Tel: 2381640 samb./ext. 7734 • Faks/Fax: 2383016 • E-mel/E-mail: prohealth@brunet.bn

SIARAN AKHBAR 

KENYATAAN MEDIA

SITUASI TERKINI JANGKITAN COVID-19

DI NEGARA BRUNEI DARUSSALAM

12 April 2020

1. Kementerian Kesihatan ingin memaklumkan kepada orang ramai bahawa Alhamdulillah, dengan izin dari Allah Subhanahu Wa Ta'ala jua, **tidak ada kes baru** jangkitan COVID-19 disahkan di negara ini pada hari ini, Ahad, 18 Syaaban 1441 bersamaan 12 April 2020. Ini bermakna **jumlah keseluruhan kes COVID-19** di negara ini kekal seramai 136 orang.
2. Sementara itu, sebanyak **2 lagi kes** yang dirawat di Pusat Pengasingan Kebangsaan telah disahkan sembuh dan dibenarkan untuk pulang ke rumah, membawa **jumlah keseluruhan yang telah sembuh kepada 106 orang**.
3. Ini bermakna, pada ketika ini, terdapat **29 kes aktif** yang masih dirawat di Pusat Pengasingan Kebangsaan di mana 2 orang masih dalam keadaan kritikal dan kedua-duanya memerlukan bantuan mesin tambahan *heart/lung machine (ECMO)* di samping bantuan mesin pernafasan manakala selebihnya adalah dalam keadaan yang baik.

4. Pada hari ini juga, jumlah keseluruhan mereka yang telah menamatkan tempoh kurantin menurut Akta Penyakit Berjangkit Penggal 204 ialah sebanyak **2,334 orang** dan hanya **66 orang** sahaja yang masih menjalani kurantin. Sementara itu, juga setakat hari ini, seramai **1,142 orang** telah menamatkan tempoh pengasingan diri mandatori di pusat-pusat pemantauan yang telah disediakan oleh kerajaan setelah pulang ke negara ini selepas melakukan perjalanan antarabangsa.

5. Dalam tempoh 24 jam yang lalu, sebanyak 247 sampel telah diuji bagi virus SARS-CoV-2 yang membawa jumlah keseluruhan ujian makmal dijalankan sejak Januari 2020 kepada 9,884 ujian.

6. Walau bagaimanapun, salah seorang dari kes yang telah sembuh dan dibenarkan pulang ke rumah telah dimasukkan kembali ke Pusat Pengasingan Kebangsaan bagi penyiasatan lanjut kerana mengalami simptom dan didapati positif semula. Dengan itu, Kementerian Kesihatan sekarang menukar dasar bagi mereka yang telah disahkan sembuh dan dibenarkan pulang ke rumah untuk menjalani pengasingan diri selama tempoh 14 hari lagi di rumah masing-masing dan akan menjalani ujian makmal bagi virus SARS-CoV-2 mengikut jadual yang telah ditetapkan. Ini adalah sebagai susulan rawatan yang diberikan kepada mereka yang telah berada di Pusat Pengasingan Kebangsaan berkenaan. Mana-mana kes yang didapati positif semula akan

dimasukkan kembali ke Pusat Pengasingan Kebangsaan bagi penyiasatan dan rawatan lanjut.

7. Sejak kes pertama COVID-19 dilaporkan di Negara Brunei Darussalam, didapati banyak berita palsu dan mengelirukan telah tular di media-media sosial. Di samping tidak mendatangkan sebarang manfaat kepada kesejahteraan rakyat dan penduduk di negara ini, berita-berita sedemikian hanya bertujuan untuk menakut-nakutkan orang ramai sehingga menyebabkan orang ramai cemas dan panik. Perbuatan menyebarkan maklumat tidak sahih, apatah lagi yang palsu dan direka oleh mereka yang semata-mata berniat untuk mengelirukan adalah menjadi kesalahan dan boleh didakwa di bawah Akta Ketenteraman Awam, Penggal 148 (Public Order Act, Cap 148) Seksyen 34, iaitu sesiapa yang sama ada menggunakan lisan atau tulisan atau menggunakan sebarang cara, menyebarkan laporan yang salah atau membuat kenyataan yang salah, yang menyebabkan ketenteraman awam terganggu boleh dipenjarakan tiga tahun dan denda sebanyak BND3,000. Orang ramai adalah juga dinasihati untuk tidak mudah terpedaya dan percaya akan maklumat-maklumat dan berita yang disebarkan melalui Internet atau melalui media-media lain seperti WhatsApp, Twitter dan Facebook tanpa memastikan kesahihannya. Orang ramai juga diingatkan untuk lebih bertanggungjawab dan tidak turut menyebarkan sebarang perkara yang tidak berasas.

8. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu www.moh.gov.bn atau menghubungi **Talian Nasihat Kesihatan 148** (pada bila-bila masa) atau melalui aplikasi healthinfo.gov.bn.

- TAMAT -

Rujukan : KK/PR/2

Tarikh : 18 Syaaban 1441H / 12 April 2020